



बूआ बसैती दा गए : इक सरसरी नजर

प्रीतिमा सांगड़ा

ग्रांS – मल्ला, तहसील – खड़ाह-बल्ली, जिला – जम्मू (जम्मू & काश्मीर) भारत

Received- 20.12.2019, Revised- 23.12.2019, Accepted - 27.12.2019 E-mail: rameshg9973@gmail.com

सारांश : 'बूआ बसैती दा गढ़' उपन्यास 2009 च छपियै पाठकें हत्थ पुज्जा। भीमू नांS दे महाउपन्यास दा एह पैहला भाग ऐ ते इसदे लेखक देशबंधु जोगरा 'नूतन' होर न।

भीमू ते मंगू द'ऊं भ्राएं दे आपसी घरेलू झगड़े कन्नै उपन्यास शुरू होंदा ऐ। झगड़े करी मंगू भीमू गी घरा कड़्डी लांदा ऐ। सिरै पर मां-बब्ब नेई होने करी भीमू कश कोई ठकारना नेई होंदा ते ओह अपना ग्रांS छोड़ी अपनी बूआ बसैती दे घर आई जंदा ऐ। बूआ बसैती विधवा होंदी ऐ पर अपने घरेआहले दी पिनशन ते जिमींदारी करी अमीर बनी जंदी ऐ। स्थाS दा बसैती बड़ी जफैदी जनानी होंदी ऐ। केई काम्मे उस कश कम्म करदे न पर उसदी झाल कोई-कोई गै झल्ल'दा ऐ।

कुंजी शब्द— उपन्यास, घरेलू झगड़ें, ठकारना, जिमींदारी, दिलचस्पी, सक्खर, सरबंध, भड़कांदा, धर्मसाल, चाल्ली।

भीमू बसैती दे घर गै रौहन लगी पौंदा ऐ। इत्थें उसदी झत्त गुग्गड़ नांS दी इक काम्मी कन्नै होंदी ऐ। गुग्गड़ उमरी दा भीमू कशा मती सक्खर होंदी ऐ ते केइयें मर्दे कन्नै सरबंध बी बनांदी ऐ। जिसलै भीमू बूआ दे घर पुज्जदा ऐ तां गुग्गड़ गी ओह पैहली नजरी च गै पसिंद आई जंदा ऐ। गुग्गड़ उस कन्नै बी सरबंध बनाना चांहदी ऐ। पर भीमू ओहदे च किश खास दिलचस्पी नेई लैंदा जिसकरी ओह अपने मनसूबे च कामयाब नेई होई पांदी। भीमू बूआ दे घरै च रौहदे होइ हर कम्म करदा ऐ जिसकरी बूआ बसैती उसगी मता हेज लांदी ऐ। बसैती भीमू गी शैहर दस्सन लेई जंदी ऐ। शैहर जाइयै ओह केई चाल्ली दियां चीजा दिक्खदा ऐ जेहड़ियां उन कदें बी नेई दिक्खी दिया होंदियां। राती ओह पंडा उंदे कश ठैहरदे न ते जन्मअष्टमी दी पूजा होने करी भीमू पंडा हुदे कन्नै मंदर च सारा कम्म करोआंदा ऐ। भीमू दे कम्म-काज गी दिक्खी पंडा होर बड़े खुश होंदे न ते उसगी अपना पुतर बनाई लैंदे न। भीमू शैहर च बूआ कन्नै राजे दे मैहल बी दिक्खदा ऐ। शैहरा थमां केई चाल्ली दियां चीजां-बस्तां खरीदी भीमू ते बूआ घर परतोई औंदे न। घर परतोई औने पर भीमू च इक नमां बदलाव आई जंदा ऐ। हून ओह अपना मन पूजा-पाठ च लान लगी पौंदा ऐ। भीमू हर दिन न्हाई-धोइयै ठोगरें दी पूजा करदा ऐ ते ओहदे परैंत बाकी कम्म गी हत्थ पांदा ऐ। बूआ दे ग्रांS दे लोक इक कमेटी दा गठन करदे न जिसदा मकसद लोकें दी भलाई ते बेहतरी आस्तै कम्म करना होग। कमेटी बनने करी ग्रांS च इक स्कूल खुल्लि जंदा ऐ ते ग्रांS दे सारे लोक अपने ०यानें गी पढाई करने लेई भेजदे न। भीमू गी बी पढ़ने दी चिड़क जाग्गी पौंदी ऐ। भीमू बी मनचित्त लाइयै अपनी पढाई रम्भ करी ओइदा ऐ। इसदे कन्नै गै ग्रांS च किश होर घटनां बी घटदियां न जि'यां ग्रांS

च नचोरें दा औना, लच्छो दी लाड़ी मसतो दी अय्याशी दे प्रेम-प्रसंग बगैरा। इ'नें घटनाएं दे चलदे गै भीमू ते गुग्गड़ च बी प्रेम पनपी पौंदा ऐ। ओह दोए इक दुए गी हिरख करन लगी पौंदे न। बूआ भीमू गी समझांदी ऐ पर भीमू ते गुग्गड़ पर बूआ दे समझाने दा कोई असर नेई होंदा। इक पारसै एह सब किश होआ करदा होंदा ऐ ते दुए पारसै जाड च अग्ग लगी जंदी ऐ। ग्रांS दे सारे लोक ते भीमू केई दिनें तगर अग्गी गी बड़ी मेहनत कन्नै सहालदे न। भीमू अग्ग लगने दा जिम्मेदार दुन्नी लम्बड़ गी ठैहरांदा ऐ। दुन्नी दे बसैती कन्नै बड़े नजदीकी सरबंध होंदे न ते ओह बसैती गी भीमू खलाफ भड़कांदा ऐ। बसैती अपने गुस्से पर काबू नेई रखदी ते भीमू गी मारन जटोई पौंदी ऐ। भीमू चुप-चाप मार खंदा ऐ पर दुन्नी लम्बड़ बारै अपनी राय नेई बदलदा। बसैती दे जुल्में थमां तंग आई भीमू गुग्गड़ गी कन्नै नसाई बूआ बसैती दा घर छोड़ी ओइदा ऐ। भीमू ते गुग्गड़ जम्मू उठी औंदे न। ओह दोए दिनें बजार फिरदे न ते रात उ'नेंगी इक सरां च कट्टनी पौंदी ऐ। गुग्गड़ भीमू गी सनांदी ऐ जे उसदी भैन सीतू बी शैहर च गै रौहदी ऐ। राती भीमू ते गुग्गड़ इक धर्मसाल च ठैहरे दे होंदे न ते उत्थें भीमू गी ग्रांS दे चुन्नू पुन्नू मिलदे न जेहड़े सीतू दै काम्मे होंदे न। चुन्नू ते पुन्नू सीतू गी गुग्गड़ ते भीमू बारै सनांदे न। सीतू आपूं धर्मसाल च आइयै उ'नेंगी अपने घर लेई जंदी ऐ। सीतू दे घर जाइयै गुग्गड़ दे रंग-ढंग बदली जंदे न ते ओह हून भीमू कशा बी दूर-दूर रौहन लगी पौंदी ऐ। सीतू भीमू गी अपने तिल्लो तलाS आहले आरे पर रखाई ओइदी ऐ। भीमू किश दिनें परैंत गुग्गड़ गी मिलने लेई औंदा ऐ। उत्थे जाई उसगी पता लगदा ऐ जे गुग्गड़ सीतू दे घरेआहले कन्नै बम्बई उठी गेदी ऐ। गुग्गड़ दी सच्चाई जानियै भीमू गी बड़ा दुख होंदा ऐ। ओह सोचदा ऐ जे जिस



गुग्गड़ लेई ओह अपना सब किश छोड़ी आया ओह उसगी गै पैसे दे लालच च छोड़ी गई। इक पाससै गुग्गड़ भीमू कन्नै एह धोखा करदी ऐ तां दूर पाससै सीतू दा खचाव भीमू आससै बधन लगी पौंदा ऐ। सीतू भीमू गी आरे थमां बापस बलाई लेंदी ऐ ते उसगी शौहर च लगगी दी अपनी बड़डी मिल्ल च मैनेजर बनाई दिंदी ऐ। ओह उसगी हर र्हूलत प्रदान करदी ऐ ते उसदे लेई सब किश आपूं खरीद दी ऐ। सीतू भीमू गी अपने घरैआहले कन्नै उसदे सरबंध बारै सनांदी ऐ ते इस कन्नै गै भीमू भाग पैहला अपने अंत तगर पुजदा ऐ।

भीमू – भाग पैहले दे चरम तगर पुज्जने पर भीमू दा चरित्तर बड़ा सच्चा ते नेक ऐ। ओह कुसै कन्नै बी गलत नेई करदा पर जिसलै ओह गलत होंदा दिक्खदा ऐ तां ओह खलाफ पूरे निश्चय कन्नै अवाज चुक्कदा ऐ। पूरा उपन्यास भीमू दे इर्द-गिर्द गै घूमदा ऐ। उपन्यास दी

शब्दावली बड़ी कठन ऐ। केई ऐसे शब्दों दी बरतून उपन्यास च होई दी ऐ जे जेकर उ'नें शब्दों पर गौर कीता जा तां डोगरी शब्दकोश च इजाफा हाई सकदा ऐ। उपन्यास च खुआनें दा बी इस्तेमाल कीता गेदा ऐ। हर पात्तर अपने थाहर अपना संघर्ष करदा लभदा ऐ। बूआ बसैती दा गढ़ पाठक गी इक उत्सुकता प्रदान करने आहला उपन्यास ऐ जेहड़ा पाठक गी बाकी दे सारे भाग पढ़ने आस्तै प्रेरदा ऐ। लेखक दा आखना ऐ जे भीमू काल्पनिक पात्तर नेई ऐ ओह इक जींदा जागदा पात्तर हा जेहड़ा लेखक दे अंचल कन्नै सरबंध रखदा हा। भीमू जनेहा उपन्यास डोगरी च आइयै डोगरी साहित्य गी सग्गोसार करदा ऐ।

संदर्भ ग्रन्थ सूची

1. देशबन्धु डोगरा 'नूतन', बुअर बसैती दा गढ़, 2009
